

Ta bay enfoca e.o riba talentonan artistico di alumnonan

Filomena College Mavo ta introduci 'Mi Talento Tambe ta Conta'



ORANJESTAD (AAN): Diamars atardi na Filomena College Mavo a tuma lugar un conferencia di prensa, unda cu a papia di un proyecto nobo yama 'Mi Talento Tam-

be ta Conta. Maestro di Filomena Adoncito Croes a splica cu e proyecto aki tin di haber cu e vision nobo di director di e scol Raquel Lampe, kende pa

varios aña tabata docente di Arte y Cultura.

"Pa nos team cu ta un team cu ta gusta arte y cultura masha hopi mes, ta simplemente un bendicion cu juffrouw Lampe



ta director di Filomena College Mavo", segun Croes.

E director tambe a hiba palabra y a splica kico e proyecto ta encera.

Segun Lampe, na momento cu el a haya un chens pa bin cu un programa nobo el a pensa riba un programa/proyecto pa promove talento di e muchanan.

"Pesey mes nos a introduci nos programa cu yama 'Mi Talento Tambe ta Conta'".

Ta hopi importante pa stimula nos alumnonan no solamente pa nan siña e vaknan cu nan tin mester di dje, sino tambe pa promove y stimula nan talento, pasobra nos tin hopi alumno talentoso y di parti di Filomena College Mavo nos kier trece un programa cu ta extenso y duradero, pa asina nos hobennan por beneficia di esaki, segun e director.

El a sigui bisa cu e programa ta consisti di diferente faceta, di cual un di nan ta e 'Huki di Talento'.

Segun Lampe, e idea a sali for di un comision special.

"Via e Huki di Talento cada biaha nos por pone un di nos alumnonan cu nan talento den e 'spotlight' aki, pero tambe ex alumnonan cu a resalta den nan carera artistico, den deporte y den cualkier otro area".

Nos tin tambe un foto contest cu yama: 'E Cara di San Nicolas', segun e director.

El a splica cu e alumnonan tin cu saca un potret di kico p'e ta representa San Nicolas y esaki nan ta manda via email. E top tres potret ta bay wordo saca pa un comision y lo haci uso di e Skina di Talento pa mostra e talento di e ganadornan.

Lampe a splica cu tin mas proyecto despues di scol, unda cu e alumnonan ta haya diferente workshop den nan area di interes.

"Esakinan lo wordo duna na e alumnonan di Filomena College Mavo gratuitamente".

Nos ta busca cooperacion cu diferente persona den comunidad, artistanan of personanan den cualkier otro area cu por yuda nos muchanan door di ofrece nan un workshop di nivel, segun e director.

El a splica cu na final di e workshop e alumnonan ta haya un certificado pa mostra kico ta e habilidadnan cu nan a siña, pero tambe pa mostra cuanto ora nan a participa na un workshop.

E certificado aki ta bira parti di nan portfolio y esaki ta hopi importante, pasobra e ta mostra e habilidad di e alumno durante e tempo cu e tabata na scol.